

2015-imi ilassutitut aningaasaliissutitut inatsisissatut siunnersuut

pillugu

Aningaasaqarnermut Akileraartarnermullu Ataatsimiititaliap

Inatsisissatut siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Jens Imanuelsen, Siumut, siulittaasoq
Inatsisartunut ilaasortaq Sara Olsvig, Inuit Ataqtigiit, siulittaasup tullia
Inatsisartunut ilaasortaq Steen Lynge, Atassut,
Inatsisartunut ilaasortaq Jess Svane, Siumut
Inatsisartunut ilaasortaq Tillie Martinussen, Demokraatit
Inatsisartunut ilaasortaq Peter Olsen, Inuit Ataqtigiit
Inatsisartunut ilaasortaq Aqqaluaq B. Egede, Inuit Ataqtigiit

Ulloq 11. april 2016-imi siullermeerinninnerup kingorna ataatsimiititaliap siunnersuut misissorpaa.

Imarisaanut nalunaarsuut:

1.	<i>Aallaqqaasiut</i>	3
2.	<i>Ilassutitut aningaasaliissutitut inatsit</i>	4
3.	<i>Naalakkersuisut 2015-imi Aningaasaqarnermut Akileraartarnermullu Ataatsimiitita-liamut aningaasaliissuteqarnissamik qinnuteqaataat</i>	6
4.	<i>2015-i aningaasanut inatsit aamma 2015-imi ilassutitut aningaasaliissutitut inatsisissatut siunnersuut – kisitsisit pingaarnert aningaasaleeriaatsinullu agguataarinerit</i>	9
5.	<i>Oqaasertaliussanik allannguinerit (inatsisissatut siunnersuummi § 2)</i>	11
6.	<i>Sillimmatitut kontomit 20.11.50-imit atugassiissutiginninnerit</i>	11
7.	<i>Aningaasaqarnermut Akileraartarnermullu Ataatsimiititaliap nalinginnaasumik oqaaseqaatai</i>	11
8.	<i>Aningaasaqarnermut Akileraartarnermullu Ataatsimiititaliap inatsisissatut siunnersuummut oqaatigiumasai allat</i>	12
9.	<i>2015-imi aningaasaliissuteqarnissamik suliassanut ataasiakkaanut oqaaseqaatit</i>	13
10.	<i>Aningaasaqarnermut Akileraartarnermullu Ataatsimiititaliap kaammattuutai</i>	14
11.	<i>Aningaasaqarnermut Akileraartarnermullu Ataatsimiititaliap inassuteqaatai</i>	15

1. **Aallaqqaasiut**

2015-imi ilassutitut aningaasaliissutitut inatsisissatut siunnersuut Aningaasaqarnermut Aatsitassanullu Naalakkersuisumit Inatsisartut 2015-imi upernaakkut ataatsimiinneranni saqqummiunneqarpoq. Inatsisissatut siunnersuut siullermeerneqarami Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq. Inatsisissatut siunnersuut Aningaasaqarnermut Akileraartarnermullu Ataatsimiititaliap suliaraa matumuunalu Inatsisartut inatsisissatut siunnersuummik aappassaaneerinninnissaannut isumaliutissiissuteqarluni.

Nunatta karsiata naatsorsuutai, Sanaartugassanut Iluarsagassanullu Aningaasaateqarfik aammalu missingersuutitut ingerlaavartumik malitseqartitsissutit ilassutitut aningaasaliissutitut inatsit peqatigalugu tassaapput pisortat aningaasaqarnermik aqutsineranni pingaarutilittut inissisimasut.

Illassutitut aningaasaliissutitut inatsisip imarai aningaasaliissutitut allannguutit

Inatsisartunit,

Aningaasaqarnermut Akileraartarnermullu Ataatsimiititaliamit aamma

Naalakkersuisunit oqaasertaliussani piginnaatinneqarlutik akuerineqartut.

Pingaartumik aningaasaliissutitut allannguutit Naalakkersuisunit akuerineqartut ilassutitut aningaasaliissutitut inatsisikkut Inatsisartunut ilaasortanit tamanillu aatsaat ataatsimoortumik takuneqarsinnaalersarput. Taamaattumik Naalakkersuisut allanngugaat taakku aningaasaqarnikkut anner-tuumik pingaaruteqarsinnaasut eqqortumik tunngaveqarluni pisimanersut nalilissallugu Aningaasaqarnermut Akileraartarnermullu Ataatsimiititaliaq – naggataatigullu Inatsisartut – suliaasaqarput annikinngitsumik.

Aningaasaliissuteqarnissamik qinnuteqaatit Naalakkersuisunit ukiup siuliani tiguneqartut ilaat isumaliutissiissummi matumani Aningaasaqarnermut Akileraartarnermullu Ataatsimiititaliamit paasissutissiissutigineqarput. Aalajangiinerit tamarmiusut Inatsisartut nittartagaanni <http://inatsisartut.gl-ip> ataani ingerlaqqiffissiami ”Aningaasaqarnermut Ataatsimiititaliap aalajangigai”-ni pissarsiarineqarsinnaapput.

Aalajangiinerit ilaat taakku arlallit aningaasaliissutinik allannguinerit aalajangersimasut kisiisa pin-nagit aammali maleruagassanik atuineq, inatsisinik qanoq paasinninnissaq kiisalu aningaasaqar-nikkut naalakkersuinikkullu anguniakkat pillugit tunngaviusumik isigineqartariaqartunik pingaa-rutilinnik aamma imaqarput.

Isumaliutissiissut ima aaqqissugaavoq:

Isumaliutissiissutip matuma immikkoortuani 2-mi missingersuutit pillugit inatsimmi aalajanger-sakkat aammalu ilassutitut aningaasaliissutitut inatsisissatut siunnersuummik saqqummiussisar-nermut inatsisitigut tunngaviit ataatsimiititaliamit takussutissiissutigineqarput.

Aningaasanut inatsimmi 2015-imi angusassatut missingersuutigineqartumut sanilliullugu 2015-imi aalajangiinerit aningaasatigut kingunerisaat immikkoortuni 3-4-imi paasisutissiisutigineqarput.

Oqaasertaliussanut aningaasanullu inatsimmi sillimatinut kontoni 2015-imi allannguinerit immikkoortoq 5, 6 aamma 7-imi misissorneqarlutillu naliliiffigineqarput.

Inatsisissatut siunnersuummi ajornartorsiutit, kukkunerit amigaatillu immikkoortoq 8-mi nassuiaateqarfigineqarput.

Aningaasaliissuteqarnissamik suliassat 2015-imi Aningaasaqarnermut Akileraartarnermullu Ataatsimiititaliamit suliarineqartut tunngaviusutut isigineqartariaqarnerpaat arlallit immikkoortoq 9-mi eqikkaavigineqarput. Ukiut siuliini ajornartorsiutaasimasut isumaliutigineqarsimasullu arlallit inerniliivigineqarput, taamaattumillu immikkoortoq taanna isumaliutissiissummi pingaernerit ilaattut isigineqartariaqarpoq.

Ataatsimiititaliaq immikkoortoq 10-imi inatsisissatut siunnersuummut arlalinnik kaammattuuteqarpoq kiisalu immikkoortoq 11-imi inatsisissatut siunnersuummut ataatsimiititaliaq inassuteqaateqarluni.

Inatsisissatut siunnersuutip aappassaaneerneqarnissaanut taama oqaaseqarluni Aningaasaqarnermut Akileraartarnermullu Ataatsimiititaliaq matumuuna isumaliutissiisuteqarpoq.

2. Ilassutit aningaasaliissutitut inatsit

2.1 Ilassutit aningaasaliissutitut inatsisissatut siunnersuummik saqqummiussineq

§ 26, imm. 3-mi aalajangersarneqarpoq Naalakkersuisut ilassutit aningaasaliissutitut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqquummik ataatsimiinnissaannut siullermut Inatsisartunut saqqummiuttassagaat. Taamaalilluni pineqartoq tassaavoq aningaasaliissutaareersunut inatsit, Suleriaaseq pillugu Ataatsimiititaliap aamma Aningaasaqarnermut Akileraartarnermullu Ataatsimiititaliap siusinnerusukkut aalajangi-gaannik aalajangersakkatigut tunngavissiisoq.

Aningaasaliissutaareersunut inatsisip pineqarnerata kingunerisaanik 2015-imi aningaasanut inatsit aamma 2015-imi ilassutit aningaasaliissutitut inatsit katillutik aningaasaliissutit oqaasertaliussallu 2015-imi atuuttut suunerinik takussutissiisussaapput. Taamaalillutik aningaasaliissutit 2015-imi aningaasanut inatsimmi aamma 2015-imi ilassutit aningaasaliissutitut inatsimmi ilaatinneqartut, taakkununggalu ilanngullugit sanaartugassanut tunngasuni suliassanut aningaasaliissutit, Nunatta Karsiata 2015-imi naatsorsuutaanut aamma 2015-imi Sanaartugassanut Iluarsagassanullu Aningaasaateqarfik pillugu Nassuiaammut tunngaviupput. Nunatta Karsiata naatsorsuutai Sanaartornerlu

pillugu Nassuiaat Inatsisartut upernaakkut ataatsimiinneranni nalinginnaasumik saqqummiunneqartarput.

2.2 Ilassutitut aningaasaliissutitut inatsisip imarisai

Ilassutitut aningaasaliissutitut inatsisip imarisarpaa inatsisip ileqqussat naapertorlugit oqaasertaa, ukununga tunngasunik nalinginnaasumik marlunnik paragrafeqartartoq:

- *aningaasaliissutit* allannguutaat, aamma
- *oqaasertaliussat* allannguutaat.

Ilassutitut aningaasaliissutitut inatsimmiittarpoq *Aningaasaliissutitut takussutissiaq*, ilanngussaq 1, kontonut pingaarnernut allannguuteqartunut tunngatillugu aningaasanut inatsimmi aningaasaliissutitut, ilassutitut aningaasaliissutitut aamma aningaasaliissutitut tamarmiusunik ilaatigut takussutissiisoq.

Taakku saniatigut ilassutitut aningaasaliissutitut inatsisip imarai *inatsisip oqaasertaanut nassuiaatit*. Nassuiaatit imaraat:

- *missingersuutitut ilanngussat*, ilassutitut aningaasaliissutitut ataasiakkaanut tunngatillugu missingersuusiornermi tunngavilersuutitut imallit, kiisalu
- *oqaasertaliussanut nassuiaatit*.

Taakku saniatigut ilassutitut aningaasaliissutitut aningaasaleeriaatsinut, oqartussaaffeqarfinnut suliasaqarfinnullu agguataarnerinut takussutissiaq Naalakkersuisut 2015-imi ilassutitut aningaasaliissutitut inatsisissatut siunnersuutaanni ilanngunneqarsimavoq.

2.3 Aningaasaliissutitut allannguinnissamik qinnuteqaateqarnissamut piunasaqaatit

Missingersuusiornermut inatsimmi § 28, imm. 2-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat tassaassasut

- *pingaarutillit*, aamma
- aningaasanut inatsisissap suliarinerani *sillimaffigereerneqarsinnaasimannngitsunut* tunngasut.

Ulluinnarni periususartut naapertorlugit Aningaasaqarnermut Naalakkersuisoq Naalakkersuisut sinnerlugit aningaasaliissutitut allanngortinneqarnissaannik qinnuteqaammik Aningaasaqarnermut Akileraartarnermullu Ataatsimiititaliamut nassiussisarpoq. Pappialat atortussat nassiunneqartut kontonut pingaarnernut, aningaasaliissutitut allanngortitsiffiginialugit qinnuteqaatigineqartunut, missingersuutitut ilanngussanik imaqtussaapput.

Taamaalilluni *allannguutissatut qinnuteqaatigineqartup nassuiarnerata tunngavilersuutitaatalu* suliaq nalilersuiffiginissaanut naammattumik sukumiissuseqarnissaat pingaaruteqarpoq. Erseqqis-

sarneqassaaq allannguutip aningaasanut inatsimmi tunngavissaatitaasunut naleqqiullugu qanoq ittuunera pingaernerpaatinneqassammat.

2.4 Aningaasaliissutit iliutsillu oqaasertaliussatigut aalajangersakkanik tunngavillit

Missingersuusiornermut inatsimmi § 25 - § 29-mi aningaasaliissutit nutaat allanngortitalluunniit pillugit aalajangersakkat malittarisassiuunneqarput, taamaalillutillu ilassutitut aningaasaliissutitut inatsimmi aalajangersakkat tunngaviusut taakkunani malittarisassiuunneqarput. § 25, imm. 1-imi aalajangersarneqarpoq:

„ukiuq aningaasanut inatsisip atuuffiata ingerlanerani nutaanik aningaasaliissuteqarnissamut oqaasertaliussaqaarnissamullu imaluunniit aningaasaliissutitik oqaasertaliussanilluunniit allanngortitsinissamut piunasaqaataasoq Inatsisartut Aningaasaqarnermut Akileraartarnermullu Ataatsimiititaliaat Inatsisartut sinnerlugit akuersissuteqaqqaarsimassasoq.“

Aalajangersakkakut tassuuna ilaatigut erseqqissarneqarpoq aningaasartuutit aningaasanut inatsimmi tunngavissaatitaasunit allaasut Aningaasaqarnermut Akileraartarnermullu Ataatsimiititaliaq sioqqutsisumik akuersissuteqareersimatinnagu aningaasartuutigeqqusaanngitsut.

§ 26-mi aalajangersarneqarpoq:

“...ukiuq aningaasanut inatsisip atuuffiata ingerlanerani nutaanik aningaasaliissutigineqartut oqaasertaliunneqartullu imaluunniit aningaasaliissutit oqaasertaliussallu allanngortinneqartut aningaasaliissutigineqarnermik kingorna ilassutitut aningaasaliissutitut inatsimmut ilanngunneqartassasut.”

2.5 Aningaasartuutitik isertitanillu nakkutillineq

Missingersuutit pillugit inatsit naapertorlugu missingersuutit pillugit ilisimatitsissummik ataatsimik ukiumoortumik Inatsisartunut saqqummiussinissaq Naalakkersuisut taamaallaat pisussaaffigaat. Tassani augustip naanerani missingersuutitut kisitsisit tunngaviugajuttarsimapput. 2005-imi taamani Aningaasaqarnermut Ataatsimiititaliaasup Naalakkersuisuusullu isumaqatigiissutigaaat aprilip naanerani pisariaqartitsinernilu allani missingersuutitut ilisimatitsissut ilanngullugu Naalakkersuisut siunissami suliarisalissagaat.

Piffissamut 2015-imi januarimit septemberimut missingersuutit pillugit ilisimatitsissummik Naalakkersuisut aatsaat ulloq 19. januar 2016 nassiusimmata ataatsimiititaliamit oqaatigineqassaaq. Ataatsimiititaliamit kissaatiginartinneqarneruvoq piffissamut januarimit augustimut missingersuutit pillugit ilisimatitsissut ukiakkut ataatsimiinnerit aallartinneritut atatillugu nassiunneqartarpat.

3. Naalakkersuisut 2015-imi Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaataat

Aningaasaqarnermut Akileraartarnermullu Ataatsimiititaliap aningaasaleeriaatsit uku allanngortinneqarnissaat nalinginnaasumik suliarisarpaa:

- *Ingerlatsinermut aningaasaliissutit*
- *tapiissutitut aningaasaliissutit, aamma*
- *sanaartornermut aningaasaliissutit.*

Taakku avataatigut soorunami ilaapput oqaasertaliussat suliassallu allat, pissutsit immikkut ittut pissutigalugit Naalakkersuisut atugassiinissaminni ataatsimiititaliamut akueritittariaqarsimasaat.

Nutaatut aningaasaliissuteqarnissamik aningaasaliissutinilluunniit allanngortitsinissamik, oqaasertaliussassatut siunnersuutitut kiisalu immikkut ittumik atugassiissuteqarnissamik Naalakkersuisut qinnuteqaatitut saqqummiussaata 22-t Aningaasaqarnermut Akileraartarnermullu Ataatsimiititaliamit 2015-imi suliarineqarput. 2015-imi ukiunilu siuliini suliat amerlassusiat takussutissiami ataaniittumi takuneqarsinnaavoq.

Ukioq	Suliat amerlassusiat
2001	66
2002	48
2003	57
2004	82
2005	69
2006	56
2007	84
2008	93
2009	58
2010	64
2011	44
2012	51
2013	36
2014	31
2015	22

Kisitsisinit takuneqarsinnaasutut suliassat ataatsimiititaliamit suliarineqartussat 2008-mili ikiliartuaarsimasutut isikkoqarput. Tamanna pitsaasuvoq, tassami aningaasaliissuteqarnissamik Aningaasaqarnermut Akileraartarnermullu Ataatsimiititaliamut amerlasuunik suliassanngortitsisarneq nunatta karsiata aningaasartuutaanik ataatsimut pingaarnersiunerup aningaasanut inatsimmi takuneqarsinnaanissaanik missingersuusiortarnermut inatsimmi tunngavissaritinneqartumut ikorfartuutaasutut isigineqarsinnaanngimmat.

Suliassat aalajangiiffisassat 22-t pineqartut Aningaasaqarnermut Naalakkersuisunit tiguneqarnermik kinguninngua Aningaasaqarnermut Akileraartarnermullu Ataatsimiititaliamit nalinginnaasumik suliarineqartarsimapput.

Suliassanit 22-nit taaneqartunit 12-it (54 %-it missaata nalingi) piffissami 1. septemberimit 2015-imi decemberip naanissaata tungaanut Naalakkersuisunit suliarineqarsimasut Aningaasaqarnermut Akileraartarnermullu Ataatsimiititaliap paasissutissiissutigisinnaavaa. Taama amerlatiginerannut pissutaasinnaavoq 2015-imut aningaasanut inatsisip aatsaat ulloq 12. maj 2015-imi akuerineqarnera.

Ukiuni siuliini ima agguataarsimapput:

2004-mi sep. – dec. suliassanit 82-init 44-t suliarineqarsimapput, tassa 54 %-it nalingi.
 2005-imi sep. – dec suliassanit 69-init 35-t suliarineqarsimapput, tassa 51 %-it nalingi.
 2006-imi sep. – dec suliassanit 56-init 30-it suliarineqarsimapput, tassa 54 %-it nalingi.
 2007-imi sep. – dec suliassanit 84-init 31-it suliarineqarsimapput, tassa 37 %-it nalingi.
 2008-mi sep. – dec suliassanit 93-init 28-it suliarineqarsimapput, tassa 30 %-it nalingi.
 2009-mi sep. – dec suliassanit 58-init 28-it suliarineqarsimapput, tassa 48 %-it nalingi.
 2010-mi sep. – dec suliassanit 64-init 30-t suliarineqarsimapput, tassa 47 %-it nalingi.
 2011-mi sep. – dec suliassanit 44-init 14-it suliarineqarsimapput, tassa 32 %-it nalingi.
 2012-imi sep. – dec suliassanit 51-init 23-it suliarineqarsimapput, tassa 45 %-it nalingi.
 2013-imi sep. – dec suliassanit 36-init 13-it suliarineqarsimapput, tassa 36 %-it nalingi.
 2014-imi sep. – dec suliassanit 31-nit 11-t suliarineqarsimapput, tassa 35 %-it nalingi.

Ukiup taamaalereernerani qinnuteqartoqartillugu aningaasat atorneqareerneranni aningaasaliissuteqarnissaq pineqartoq aarleqqutigineqarsinnaavoq. Taamaattumik ajornartorsiut taanna Naalakkersuisunit suli eqqumaffigineqartariaqarpoq, missingersuusiornermummi inatsit unioqqutillugu aningaasat atorneqareersut aningaasaliissutinik akuersissuteqarnissaq Aningaasaqarnermut Akileraartarnermullu Ataatsimiititaliamit kissaatigineqanngimmat.

Aalajangiiffisassatut siuliassat pineqartut 22-t 2015-imeersut Aningaasaqarnermut Akileraartarnermullu Ataatsimiititaliamit ima amerlatigisoriarluni suliarineqarput:

- Suliassat 19-t ataasiarluni suliarineqarput aammalu
- Suliassat pingasut marloriarluni suliarineqarlutik

Taamaalillutik Aningaasaqarnermut Akileraartarnermullu Ataatsimiititaliap aalajangiineratigut suli at tamarmik naammassillugit suliarineqarput.

Suliani naammassineqartuni tamani Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit akuerineqarsimapput.

Suliani arlalinni Naalakkersuisut ilassutitut aningaasaliissuteqarnissamik qinnuteqaataannik ataatsimiititaliap akuersinera missingersuutitut ilanngussatigut takussutissaqartinneqartanngikkaluartoq, sulianut 2015-imi Inatsisartut Aningaasaqarnermut Ataatsimiititaliaannit akuerineqartunut missingersuutitut ilanngussat pisariaqartut 2015-imut ilassutitut aningaasaliissutitut inatsisissatut siunnersuummut ilanngunneqarsimasut Aningaasaqarnermut Ataatsimiititaliamit oqaatigineqassaaq.

4. 2015-i aningaasanut inatsit aamma 2015-imi ilassutitut aningaasaliissutitut inatsisissatut siunnersuut – kisitsisit pingaarnerit aningaasaleeriaatsinullu agguataarinerit

4.1 Kisitsisit pingaarnerit aningaasanngorlugit

2015-imi aningaasanut inatsimmi aamma 2015-imi ilassutitut aningaasaliissutitut inatsisissatut siunnersuummi kisitsisit pingaarnerit aningaasanngorlugit takussutissiarineqarnerat 2015-imi ilassutitut aningaasaliissutitut inatsisissatut Naalakkersuisut siunnersuutaata danskisuuani qupperneq 21-imi kalaallisuuani qupperneq 22-mi takuneqarsinnaapput, taakkulu innersuussutigineqartut.

Aningaasaliissutit allannguinerit IST-mut 4,8 mio. kr.-inik sunniutillit Aningaasaqarnermut Akileraartarnermullu Ataatsimiititaliamit 2015-imi akuerineqartut (missingersuutitigut pitsanngoriaat). Immikkut aningaasaliinerit taakku nassataarat IST-mi angusassatut missingersuutigineqartut katillugit **22,2 mio. kr.-inik** amigartooruteqarfiunerat. Taamatuttaaq ilassutitut aningaasaliissutit akuerineqartut kinguneraat IS-imi angusassatut missingersuutigineqartut 8,7 mio. kr.-inik ajorse-riarnerat, taamaallunilu ukiumut aningaasanut inatsiseqarfimmut 2015-imut IS-imi amigartoorutissatut missingersuutigineqartut 73,0 mio. kr.-iullutik.

Matumani eqqaamasariaqarpoq angusassatut *missingersuutit* inaarutaasumillu *naatsorsuutitigut angusat* assigiinngimmata. 2015-imi inaarutaasumik naatsorsuutitigut angusat 2015-imi Nunatta Karsiata naatsorsuutaani, Inatsisartut upernaakkut ataatsimiinneranni saqqummiunneqarlutillu siullermeerneqartussatut naatsorsuutigineqartumi takuneqarsinnaapput.

4.2 Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut

Inatsisissatut siunnersuummi ilaapput ilassutitut aningaasaliissutit ukuninnga akuersissutigineqartut

- Naalakkersuisunit, oqaasertaliussanik innersuussinikkut
- Aningaasaqarnermut Akileraartarnermullu Ataatsimiititaliamit
- Inatsisartunit/Inatsisartut Suleriaaseq pillugu Ataatsimiititaliaannit

Aningaasaliissutit allannguutaat aalajangersimasut *Aningaasaliissutitut takussutissiami, inatsisissatut siunnersuummi ilanngussaq 1-imi*, takuneqarsinnaapput. Allannguutit ataasiakkaat missingersuutitut ilanngussartaqartut, taakkunanilu allannguutit erseqqinnerusumik nassuarneqartut. *Ilanngussaq 1-imi taamatullu missingersuutitut ilanngussani takuneqarsinnaassaaq* Aningaasaqarnermut Akileraartarnermullu Ataatsimiititaliaq Naalakkersuisullunniit imaluunniit Inatsisartut Suleriaaseq pillugu Ataatsimiititaliaat aningaasaliissutit allannguisoqarnissaanik qanga akuersi-
simanersut suliarlu sorleq pineqarnerisooq.

4.3 Naalakkersuisut oqaasertaliussamut innersuussillutik akuersissutigisaat

Oqaasertaliussat tunngavigalugit aningaasaliissutinik nuussinerit amerlasuut Naalakkersuisunit akuersissutigineqarput. Nuussinerit takku ataatsimut isigalugu ilanngaattissat ilanngaatigereerlugit missingersuutininut sunniuteqanngillat.

Naalakkersuisut aalajangiineranni tunngavissaatitaasut eqquutsinneqarsimanersut Aningaasaqarnermut Akileraartarnermullu Ataatsimiititaliap erseqqinnerusumik naliliiffigisimavaa. Isumaliutissiisutip immikkoortuani 7.3-mi allassimasut innersuussutigineqarput.

4.4 Aningaasaqarnermut Akileraartarnermullu Ataatsimiititaliamit akuersissutigineqarput

Ingerlatsinerimut aningaasaliissutit

Ingerlatsinerimut aningaasaliissutinik allannguinerit ilanngaattissat ilanngaatigereerlugit -5,850 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput. (Missingersuutitigut pitsanngoriaat).

Tapiissutit aningaasaliissutit

Tapiissutit aningaasaliissutinik allannguinerit ilanngaattissat ilanngaatigereerlugit 2,850 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput. (Missingersuutitigut ajorseriaat).

Aningaasaliissutit inatsisitigut pisussaaffigisat

Aningaasaqarnermut Akileraartarnermullu Ataatsimiititaliamit aningaasaliissutinik inatsisitigut pisussaaffigisanik allanquinissamik akuersissuteqartoqanngilaq, tamannalu missingersuusiornermut inatsimmi § 27-mut naapertuuppoq.

Isertitassat aningaasaliissutit

Isertitassat aningaasaliissutinik allanquinissamik Aningaasaqarnermut Akileraartarnermullu Ataatsimiititaliaq 2015-imi ilanngaattissat ilanngaatigereerlugit -5,206 mio. kr.-inik sunniuteqartussamik akuersissuteqarsimavoq (Missingersuutitigut pitsanngoriaat).

Sanaartugassanut aningaasaliissutit

Sanaartugassanut aningaasaliissutinik allanquinissamik qinnuteqaatit ilanngaattissat ilanngaatigereerlugit 3,4 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput (Missingersuutitigut ajorseriaat).

4.5 Inatsisartut Suleriaaseq pillugu Ataatsimiititaliaannit akuersissutigineqartut (suliassaqqarfik 01)

Soqanngilaq.

5. **Oqaasertaliussanik allannguinerit (inatsisissatut siunnersuummi § 2)**

Oqaasertaliussat sisamat inatsisissatut siunnersuummi ilanngunneqarput. Oqaasertaliussat akuerineqartut taakku 2015-imi aningaasanut inatsimmi oqaasertaliussat taamaaqqataat taarserpaat/ilasuserpaat. Taakku sisamat Aningaasaqarnermut Akileraartarnermullu Ataatsimiititaliap akuersisuteqarnera tunngavigalugu ilanngunneqarput.

6. **Sillimmatinut kontomit 20.11.50-imit atugassiissutiginninnerit**

2015-imut aningaasanut inatsit kontomi pingaarnermi 20.11.50-imi ingerlatsinermut sillimmatinik 10,0 mio. kr.-inik ilaqartillugu akuersissutigineqarpoq. Aningaasanut inatsiseqarfimmi 2015-imi ingerlatsinermut sillimmatinit 0,5 mio. kr.-it atugassiissutigineqarput, taakkulu ataatsimiititaliap ilassutitut aningaasaliissuteqarnissamik suliaa nr. 15/704 aqqutigalugu aalisartut piniartullu Tunumi novembarip naanerani Piterarnerata kingunerisaanik eqqorneqartut aallarteqqinnissaannut ikiuutitut akuersissutigineqarput.

Sillimmatinut kontonit aningaasalersugaasunik suliniutinik nutaanik piviusunngortitsinerup aallartitsinerullu missingersuusiornermut inatsimmi § 5, ukiumi aningaasanut inatsiseqarfiusumi Inatsisartut aningaasaqarnermik ataatsimoortumik tullerriarinerannik aningaasanut inatsisip ersersitsisuunissaanik aalajangersaasoq, naapertorlugu pinissaa pingaaruteqarpoq. Taamatut ataatsimoortumik tullerriarinerermut taarsiullugu atorineqarsinnaavoq “ingerlaavartumik tullerriarineq”, taannali tullerriarineruinngilaq, tassaallunili inuiaqatigiit aningaasaataannik nalaatsortumik pitsaanerpaajunngitsumillu atuineq.

Tamatuma saniatigut Namminersorlutik Oqartussat aqutsivianni piviusorsioortumik missingersuusiortarnissamut missingersuutinillu malitseqartitsisarnissamut kajumilersitsinissaq pisariaqartoq qulakkeerneqarsinnaaqqullugu aningaasanut inatsisini sillimmatitut aningaasaliussat aallaavittut isigalugu sapinngisamik killeqartinneqarlutillu siunertamut aalajangersimasumut immikkoortinneqartariaqarnerat ukiut siuliinisulli Aningaasaqarnermut Akileraartarnermullu Ataatsimiititaliamit oqaatigineqassaaq.

7. **Aningaasaqarnermut Akileraartarnermullu Ataatsimiititaliap nalinginnaasumik oqaaseqaatai**

7.1 **Ataatsimut isigalugu**

Aningaasanut inatsimmi oqaasertaliussat aammalu oqaasertaliussat, Aningaasaqarnermut Akileraartarnermullu Ataatsimiititaliamit kingusinnerusukkut akuersissutigineqartut 2015-imilu ilassutitut aningaasaliissutinut inatsimmi ilanngunneqartut naapertorlugit kontot pingaarnert assigiinngitsut kiisalu sanaartornerup iluani suliaat akornanni nuussinissanut Naalakkersuisut piginnaatinnerqarput.

Nuussinissat akuersissutigineqarsimatillugit aningaasaliissutinik allanngortitsinerit pinerit tamaasa inatsisissatut siunnersuummi aningaasaliissutinut takussutissiap, *ilanngussaq 1*-ip, immikkoortor-

taani (kolonne) ilanngunneqartarput. Missingersuutitut ilanngussani nuussinernut tunngavilersuutit aammalu Naalakkersuisut ulloq akuersissutiginniffiat allassimassapput. Kiisalu oqaasertaliussat, nuussinissamut tunngaviliisuusut pillugit paasissutissat nalunaarneqassapput.

7.2 Sulisorisat pillugit paasissutissat

Missingersuusiornermut malittarisassami 2008-meersumi immikkoortoq 5.2 Aningaasaqarnermut Akileraartarnermullu Ataatsimiititaliamit innersuussutigineqassaaq, tassani sulisorisassatut naatsorsuutigisat taakkulu naatsorsorneqartarnerat pillugit paasissutissiissuteqarnissamut Naalakkersuisut najoqqutassanik pitsaalluinnartunik aalajangersaasimapput.

Suliffiit aalajangersimasumik amerlassusilikkat pineqannginnerat erseqqissarneqarsinnaaqqullugu aningaasaliissutitut inatsisissani aggersuni sulisorisassatut naatsorsuutigisat pillugit takussutissiani ukioq naallugu sulisorisat atorneqartalernissaat Aningaasaqarnermut Akileraartarnermullu Ataatsimiititaliap ukioq manna **aammaarluni** siunnersuutigissavaa. Taamaalilluni oqariaaseq ukioq naallugu sulisorisat eqqornerusutut isigineqarpoq, soorluttaaq sulisorisassatut naatsorsuutigisat aalajangersimasumik atorfitut paatsoorneqarlutik paasineqarsinnaanerat killilerneqassasoq.

7.3 Naalakkersuisut aningaasaliissutit nuussineranni inatsisitigut tunngavissat

Inatsisitigut tunngavissaatit naapertorlugit Naalakkersuisut nuussineri pisimanersut Aningaasaqarnermut Akileraartarnermullu Ataatsimiititaliamit erseqqinnerusumik naliliiffigineqarsimavoq. Ataatsimut isigalugu pissutsinik tamatumunnga naapertuutinningsunik ataatsimiititaliap nalaataqarsimanngilaq.

8. Aningaasaqarnermut Akileraartarnermullu Ataatsimiititaliap inatsisissatut siunnersuummut oqaatigiumasai allat

8.1 Nalinginnaasumik oqaaseqaatit

Aallaqqaasiutigalugu isumaliutissiisummi immikkoortoq 3 innersuussutigineqarpoq, tassani suliat amerlassusiat, qinnuteqaatinik Aningaasaqarnermut Akileraartarnermullu Ataatsimiititaliap suliarininnerata inerneru naapertorlugit agguataakkamik nalunaarsorneqarsimallutik.

Aalajangiinerni arlalinni annertunerusumik paasissutisseeqqullugit missingersuutinulluunniit ilanngussamik nutaamik nassiusseqqullugit Naalakkersuisut ataatsimiititaliamit qinnuigineqarsimapput. Taakkuttaaq pisariaqartillugu aalajangiinerni ataasiakkaani taaneqartarput.

Ilaatigut ilusiligaanermikkut inissitsiterneqarnermikkullu assigiissaarneqarnissaasa kiisalu aningaasaliissutitut tunngasut nassuiarneqarnerisa pitsaasuunissaasa qulakkeerneqarnissaat siunertaralugu missingersuutitut ilanngussat ilassutitut aningaasaliissutitut inatsisissatut siunnersuummi ilanngunneqannginneranni Naalakkersuisunit misissorneqartarnissaat Aningaasaqarnermut Ataatsimiititaliamit nalinginnaasumik naatsorsuutigineqarpoq.

8.1.1 Sillimaffiginnissinnaasimannginnissamik inatsimmi piumasaqaat

Ataatsimut isigalugu ukiumi qaangiuttumi aningaasaliissuteqarnissamik suliassat tunngavigalugit missingersuusiornermut inatsimmi § 28, imm. 2-p ataqqineqarnissaata erseqqissarneqarnissaa pisariaqarsorinarpoq. Aalajangersakkakut aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut *pingaarutilinnut* aammalu aningaasanut inatsisissap suliarinerani *sillimaffigereerneqarsinnaasimanngitsunut* tunngasuusassasut.

Suliassat taamaattut 2015-imi amerlagisassaannginnerat ataatsimiititaliamit nuannaarutigineqarpoq.

9. 2015-imi aningaasaliissuteqarnissamik suliassanut ataasiakkaanut oqaaseqaatit

Aningaasaliissuteqarnissamik qinnuteqaatit pillugit sulianut ataasiakkaanut ataatsimiititaliaq matuma kingulianiittunik oqaaseqaateqassaaq aammalu ataatsimiititaliap aalajangigai Inatsisartut nittartagaanni <http://inatsisartut.gl-ip> ataani ingerlaqqiffissiami ”Aningaasaqarnermut Ataatsimiititaliap aalajangigai”-ni pissarsiarineqarsinnaasut innersuussutigissallugit. Piffissaagallartillugu peqqissaarussisarnissap pisariaqarnera sulit pingasut uppernarsisippaat.

9.1 Kalaallit Nunaanni ilaasunik, nassiussanik allakkanillu angallassineq pillugu kiffartuussinissamut isumaqatigiissutit ukiumik ataatsimik sivitsorneqarnissaannut isumaqatigiissusiornissamut piginnaatinneqarnissap akuerineqarnissaanik qinnuteqaat (suliaq nr. 15-690).

Kalaallit Nunaanni ilaasunik angallassineq pillugu kiffartuussinissamut isumaqatigiissusiornissamut piginnaatinneqarnissap qinnutigineqarneranut suliaq taanna tunngavoq. Kiffartuussinissamut isumaqatigiissusiornissap aallartinneqarnissaanut piginnaatinneqarnissap akueritinnissaa Naalakkersuisut ajoraluartumik angunerisinnaasimanngilaat. Taamaattumillu tamatumunnga taarsiullugu kiffartuussinissamik isumaqatigiissutit atuuttut sivitsorneqarnissaasa Aningaasaqarnermut Akileraartarnermullu Ataatsimiititaliamut Naalakkersuisut qinnutigisariaqarsimavaat, tamatumalu kinguneraa siunertamut aningaasaliissutit amerlinerat.

9.2 2015-imi immikkut ittunik aningaasartuuteqarsimanerup kinguneranik Nunanut Allanut Pisortaqarfimmut ilassutitut aningaasaliissuteqarnissamik qinnuteqaat (suliaq nr. 15-697).

Suliamut allanut atatillugu ataatsimiititaliamit paasineqarpoq allaffissornermi nammeneq periuserisaq pillugu eqqartuussissuserisut annertunerusumik nassuiaasiortinneqarnissaannik pisariaqartitsilernissaq sapinngisamik pinngitsoortinniarneqartariaqartoq. Ataatsimiititaliap isumaa malillugu suliat taamaattut Naalakkersuisut ulluinnarni allaffissornikkut isumaginninnerannik apeqqusiinermik pilersitsisarput. Tamanna Namminersorlutik Oqartussani allaffissornermut taamaallaat atuutinnngilaq, aammali attaveqarfimmut avataaneersunut allanut atuulluni.

Suliaq nr. 15-697-imut Naalakkersuisut paasissutissiinerat malillugu 2015-imi qaammatini kingulerni nunani allani suliassaqarfiit pisariaqarnerpaat, tassungalu ilanngullugu ataatsimiinnerit nunatinnut pingaarutillit ingerlatiinnarnissaannut ilassutitut aningaasaliissuteqarnissaq pisariaqarpoq.

Pituffimmut kiffartuussinissamut isumaqatigiissut pillugu suliami kukkunerit uteqqinneqannginnissaat ataatsimiititaliamit sakkortunerpaamik kaammattuutigineqassaaq.

9.3 Ilinniarititaanermut, Kultureqarnermut, Ilisimatusarnermut Ilageeqarnermullu suliassaqaqfimmi atuinikinneruneq atuinerusimanagerlu pissutigalugit missingersuutitut sunniuteqanngitsumik nuussineq kiisalu konto pingaarnep 84.40.16-ip ataani kultureqarnermut sanaartukkani titartakkanut toqqorsiviliornissamut aningaasaliineq (suliaq nr. 15-705).

Naalakkersuisoqaqfimmi atuinikinneruneq atuinerusimanagerlu pissutigalugit missingersuutitut sunniuteqanngitsumik nuussinissaq kiisalu titartakkanut toqqorsiviliornissamut aningaasaliinissaq pillugu qinnuteqaat una Aningaasaqarnermut Akileraartarnermullu Ataatsimiititaliamit tiguneqarpoq. Qinnuteqaat ataatsimiititaliamit akuerineqarpoq, taamaattumillu isornartorsiuineq aningasat nuuneqartut atornerqarnerannut tunnganngilaq. Ataatsimiititaliap isumaa malillugu suliap ajuusaarnartora kontomut pingaarnep 40.94.28-mut, nunatsinni tusagassiuutitut naqitanut tapiissutitut tunngasumut, aningaasaliissutit 1.600.000 kr.-inik ikilillugit nuuneqarnerisigut titartakkanut nutaamik toqqorsiviliornissap aningaasalersorneqarnissaa. Nunatsinni tusagassiuutitut naqitanut tapiissutitut aningaasaliussat Naalakkersuisut 2013-imit atorumanngilaat. Ataatsimiititaliap isumaa malillugu kontop pingaarnep siunertarisaanut tunniussinissamullu piumasaqaatinut attuumanngilluinnartunik Naalakkersuisut tunngavilersuuteqarput. Taarsiullugu Naalakkersuisut kontomik pingaarnep nutaamik pilersitsipput, taannalu pisariaqartinneqarsimagunangitsoq suliap matumani pineqartup takutippaa.

10. Aningaasaqarnermut Akileraartarnermullu Ataatsimiititaliap kaammattuutai

2015-imi ilassutitut aningaasaliissutitut inatsisissatut siunnersuummik kiisalu Naalakkersuisut aningaasaliissutitut allannguutissatut siunnersuutaannik suliarinninnermini taakkunanngalu malitseqartitsisarnermit misilittakkani tunngavigalugit Naalakkersuisunut kaammattuutunik arlalinnik ukuninnga saqqummiussinissaminut Aningaasaqarnermut Akileraartarnermullu Ataatsimiititaliap pissutissaqarsorivoq:

Kaammattuut nr. 1

Missingersuutunik qaangiinissaq pinngitsoorneqarsinnaanngitsoq erseqqitsillugu nunatta karsiata naatsorsuutaasa kusassarneqarnissaat siunertariinnarlugu ukiumi aningaasanut inatsisip atuuffiata naalernerani nuusserit ingerlanneqartannginnissaannik Naalakkersuisut Aningaasaqarnermut Akileraartarnermullu Ataatsimiititaliamit **kaammattorneqarput**. Taamaattoqartillugu aningaasaliissutunik nuussinnaatitaanerminnik Naalakkersuisut atuinngitsoorluarsinnaapput, tassungalu taarsiullugu nuussinissamik qinnuteqaammik Aningaasaqarnermut Akileraartarnermullu Ataatsimiititaliamut saqqummiussillutik. Tassunga taarsiullugu missingersuutunik sippuinnermut pissutaasoq nunatta karsiata naatsorsuutaanut atatillugu naatsorsuutitut nassuiaatini ersarissarneqarsinnaavoq.

Kaammattuut nr. 2

Missingersuutit pillugit ilisimatitsissutinik Inatsisartunut akuttunngitsumik nassiussisarnertik Naalakkersuisut piaartumik ingerlateqqilissagaat Aningaasaqarnermut Akileraartarnermullu Ataatsimiititaliamit **kaammattuutigineqarpoq**.

Kaammattuut nr. 3

Ilaatigut sullissinissamik isumaqatigiissutit aqputigalugit tapiissuteqartarneq pillugu ilassutitut aningaasaliissuteqarnissamik qinnuteqaatinik piffissaq eqqorlugu pilertortumillu nassiussisarnissaq nalinginnaasumik qulakkeertaqqullugu Naalakkersuisut Aningaasaqarnermut Akileraartarnermullu Ataatsimiititaliamit **kaammattorneqarput**, taamaalilluni qinnuteqaatit taamaattut siumut sunniuteqartussanngorlugit akuerineqarsinnaaqqullugit.

Kaammattuut nr. 4

Ilassutitut aningaasaliissuteqarnissamik qinnuteqaatinik pinngitsoortinneqarsinnaasimagaluartunik nassiussisarnerit pinngitsoortinneqarsinnaaqqullugit Naalakkersuisut suliani tamani piffissaagallartillugu peqqissaarussisarnissamik Aningaasaqarnermut Akileraartarnermullu Ataatsimiititaliamit **kaammattorneqarput**.


Kaammattuut nr. 5

Qinnuteqarnikkut tapiissutinik tunniussisarnermut piumasaqaatit aningaasanut inatsimmi missingersuutitut ilanngussani ataasiakkaani nassuiaatigineqartut atorneqarneranni peqqissaarussisarnissamik Naalakkersuisut Aningaasaqarnermut Akileraartarnermullu Ataatsimiititaliamit **kaammattorneqarput**. Tunngavilersuut tulluanngitsoq suliamik ingerlatsinissamut aningaasanut inatsimmi piumasaqaatinut attuumassuteqanngitsoq innuttasut inatsisitigut illersugaanerannik sanngiillisisutut ataatsimiititaliamit isigineqarpoq.


11. Aningaasaqarnermut Akileraartarnermullu Ataatsimiititaliap inassuteqaatai

Tamanna tunngavigalugu siunnersuut Inatsisartunit akuerineqassasoq **Aningaasaqarnermut Akileraartarnermullu Ataatsimiititaliap isumaqatigiittup inassutigaa**.


Taama oqaaseqarluni Inatsisartut Aningaasaqarnermut Akileraartarnermullu Ataatsimiititaliaata 2015-imi ilassutitut aningaasaliissutitut inatsisissatut siunnersuut aappasaaniigassanngortippaa.




Jens Immanuel,
siulittaasoq




Aqqaluaq B. Egede,
siulittaasup tullia




Jess Svane



Steen Lyng



Thie Martinussen



Peter Olsen



Sara Olsvig